

GEORGICON III

multi etiam excretos prohibent a matribus haedos,
 primaque ferratis praefigunt ora capistris.
 quod surgente die mulsero horisque diurnis, 400
 nocte premunt; quod iam tenebris et sole cadente,
 sub lucem: exportant calathis (adit oppida pastor),
 aut parco sale contingunt hiemique reponunt.

Nec tibi cura canum fuerit postrema, sed una
 uelocis Spartae catulos acremque Molossum 405
 pasce sero pingui. numquam custodibus illis
 nocturnum stabulis furem incursusque luporum
 aut impacatos a tergo horrebis Hiberos.
 saepe etiam cursu timidos agitabis onagros,
 et canibus leporem, canibus uenabere dammas; 410
 saepe uolutabris pulsos siluestribus apros
 latratu turbabis agens, montisque per altos
 ingentem clamore premes ad retia ceruum.

Disce et odoratam stabulis accendere cedrum
 galbaneoque agitare grauis nidore chelydros. 415
 saepe sub immotis praesepibus aut mala tactu
 uipera delituit caelumque exterrita fugit,
 aut tecto adsuetus coluber succedere et umbrae
 (pestis acerba boum) pecorique aspergere uirus,
 fouit humum. cape saxa manu, cape robora, pastor, 420
 tollentemque minas et sibila colla tumentem
 deice! iamque fuga timidum caput abdedit alte,
 cum mediis nexis extremaeque agmina caudae
 soluuntur, tardosque trahit sinus ultimus orbis.
 est etiam ille malus Calabris in saltibus anguis 425
 squamea conuoluens sublato pectore terga
 atque notis longam maculosus grandibus aluum,
 qui, dum amnes ulli rumpuntur fontibus et dum